

NEWSLETTER

januar
2019.



FONDACIJA
HASTOR





GARANCIJA ZA USPJEH: SANJATI, ŽELJETI I PRUŽITI SVOJ MAKSIMUM

U subotu, 12. januara, u prostorijama ASA Prevent grupacije održan je prvi ovomjesečni sastanak studenata stipendista Fondacije Hastor. Čast nam je bila ugostiti našeg nekadašnjeg stipendista Elvira Kadrića koji je nesobično podijelio svoja znanja i iskustva, te uputio neprocjenjive savjete prisutnim mladim ljudima.

Studente su najprije pozdravili učitelj Ramo i direktor Fondacije Seid Fijuljanin te su prisutnima dali određene savjete i upute u vezi sa njihovim studijem i angažmanom u Fondaciji.

Nerijetko na mjesecnim druženjima stipendisti naše fondacije imaju priliku slušati predavanja mlađih uspješnih ljudi koji važe za velike stručnjake u poslovnom svijetu, a koji s radošću prihvataju naš poziv da svoje znanje podijele s velikom grupom studenata koji će uskoro zakoračiti na dinamično i nepredvidivo tržište rada.

Posebno nam je draga kada na ovim druženjima možemo ugostiti naše nekadašnje stipendiste, a danas uspješne mlade ljudi, koji u svojim sferama djelovanja svakodnevno pomjeraju granice. Jedan od takvih profesionalaca je upravo Elvir Kadrić koji je prije nekoliko godina bio u poziciji naših sadašnjih stipendista i koji najbolje poznaje šeđ za znanjem i uspjehom koju dijele svi stipendisti Fondacije Hastor. Stipendistom naše fondacije postao je kao srednjoškolac, davne 2007. godine u doba kada je učitelj Ramo lično posjećivao škole i pronalazio prve stipendiste. Status stipendiste zadržao je punih šest godina, no veza između Fondacije i ovog divnog mladog čovjeka ostat će neraskidiva još dugi niz godina.

Već pet godina zaposlenik je ASA Osiguranja, vodeće domaće osiguravajuće kuće koja brine o sigurnosti življenja i poslovanja svojih klijenata pružajući im maksimalnu zaštitu svojim proizvodima i uslugama.

Za pet godina rada u ovoj osiguravajućoj kući napredovao je od pozicije pripravnika-saradnika za finansije do funkcije direktora sektora za finansije čiju dužnost trenutno obnaša.

Stipendistima je naročito bila zanimljiva Elvirova profesionalna putanja uzimajući u obzir činjenicu da je za relativno kratak vremenski period ostvario svoj san da bude najbolji u nekom finansijskom sektoru. No, ovaj izuzetno skromni mladić fokusirao je svoje izlaganje na Fondaciju koju velikim dijelom smatra zaslužnom za svoj uspjeh, a svoje znanje s prisutnim studentima podijelio je kroz dvije prezentacije. U prvoj prezentaciji govorio je o poslovnom bontonu, odnosno pravilima pisanja i slanja e-mail poruke. Pravila e-mail bontona važno je znati i pridržavati ih se kako bismo se njima predstavili na najbolji mogući način, bez obzira na to da li tražimo posao ili se obraćamo poslovnom partneru.

U drugoj prezentaciji predavač je govorio o ulaganju (zaduživanju) putem vrijednosnih papira na tržištu kapitala. Studenti koji nisu upoznati s ovim

područjem imali su sjajnu priliku naučiti šta su to vrijednosni papiri, šta je tržište kapitala te koje su njegove karakteristike i učesnici.


U dijelu predviđenom za diskusiju prisutni studenti ekonomije su podijelili svoja mišljenja i znanja u vezi s ovom tematikom, što je naročito oduševilo našeg predavača, ali i ostale studente.

Svojim mladim kolegama, stipendistima Fondacije Hastor Elvir je poručio da ne odustaju od svojih snova te da se svaki zacrtani cilj u životu može ostvariti ukoliko pružimo maksimum svojih mogućnosti.

Na tom putu važno je da ne izgubimo sebe, a predanim radom i osobinama kojima nas Fondacija uči možemo itekako biti primjer drugima i potaknuti druge na djela koja će donijeti dobrobit našem društvu.

Džulisa Otuzbir





PREVENT GRUPACIJA OBILJEŽILA 20 GODINA POSLOVANJA

Svečanom manifestacijom koja je održana 10. januara 2019. godine u Zenici, u prisustvu više od 6000 zaposlenika, Prevent grupacija je zvanično obilježila dvadesetu godišnjicu posovanja. Ova svečanost bila je prilika da se predstave neki od ključnih događaja koji su obilježili posovanje Prevent grupacije u proteklim godinama, te pošalje snažna poruka zajedništva, poduzetničke vizije i kontinuiranog napretka.

Tokom svog obraćanja zaposlenicima, gospodin Nijaz Hastor, vlasnik i osnivač ASA Prevent grupacije i Fondacije Hastor, istakao je kako je 20 godina značajan jubilej koji pokazuje zrelost jednog poslovnog sistema koji je snaga razvoja Bosne i Hercegovine. „Vi ste moja priča. Pozivam vas da nastavimo zajedno rasti i graditi Bosnu i Hercegovinu i da naredni jubilej obilježimo na stadionu Koševo“, istakao je gospodin Hastor i na taj način poslao jasnu poruku daljem razvoju Prevent grupacije u Bosni i Hercegovini.

„Prevent je 1999. godine, kada je osnovan u Visokom, zapošljavao 50 zaposlenika. Već početkom 2000. taj broj se udvostručio, da bismo u proteklom periodu u prosjeku svaki dan otvarali jedno novo radno mjesto“, istakao je Adnan Smailbegović, član Nadzornog obora Prevent grupacije osvrćući se na same početke poslovanja.

Dvadeset godina od osnivanja, Prevent grupacija je vodeći industrijski brend Centralne i Istočne Evrope (CEE). „Samo u Bosni i Hercegovini prisutna je na 16 lokacija i djeluje u oblastima namještaja, mode, autoindustrije, metala, nautike, medicinskih sredstava, proizvodnje električnih kablova i zaštitne opreme“, istakao je tokom obraćanja direktor Prevent CEE Haris Rahman, te dodao kako je Prevent kroz protekli period značajno investirao u širenje posovanja, nove akvizicije, te izgradio impresivne pogone za preradu metala u Iljašu, pogone za proizvodnju namještaja u Ključu i Visokom, pokrenuo proizvodnju modne konfekcije i obuće u Travniku i Bugojnu, te na taj način postavio temelje za dalji rast i napredak.

Nagradom za sveukupan doprinos razvoju bh. privrede i društva dodijeljene u okviru projekta „100 najvećih“ stavljen je pečat na rad Preventa u protekla dva desteljeća.

Prisutni su uživali u nastupima bh. muzičkih zvijezda: Divanhane, Amela Ćurića, Adnana Jakupovića i Enesa Begovića, a kroz program ih je vodio fantastični duo Adrijana Kurtišaj i Enis Bešlagić.

Stipendisti Fondacije Hastor uveliko su doprinijeli organizaciji samog događaja, ali i svečanom programu. Naime, grupa stipendista s Muzičke

akademije pripremila je nekoliko muzičkih izvedbi, zajedno s našim novim članom – Ilmom Karahmet. Njihov nastup bio je u svrhu predstavljanja Fondacije i zaista su to uredili u najboljem svjetlu.

Druga grupa stipendista bila je uključena u organizaciju manifestacije. Stipendisti koji žive ili studiraju u Zenici su od jutarnjih sati, pa do kraja programa aktivno radili i pomagali organizatorima da bi sve prošlo u najboljem redu. Marljinost, odgovornost i upornost samo su neke od pozitivnih

karakteristika koje su uočene kod naših stipendista. Ponosni smo na naše stipendiste i rezultate koje su postigli i nadamo se da ćemo i dalje slušati samo lijepе priče, gdje god se oni pojavili.



ISTRAŽIVACKI RAD STIPENDISTKINJE EMINE TODOROVAC OBJAVLJEN U NAUČNOM ČASOPISU „DRUGS AND CHEMICAL TOXICOLOGY“

Da su stipendisti Fondacije Hastor izuzetno predani studiju i oblasti kojom se bave na istom, te da zahvaljujući tome ostvaruju značajne uspjehe u sferi obrazovanja i nauke, dokaz je mlada stipendistkinja Fondacije Hastor, koja se ističe svojim radom, trudom i zalaganjem koji ulaze, kako u studij koji pohađa, tako i u volonterski angažman u Fondaciji Hastor.

Riječ je o Emini Todorovac, stipendistkinji Fondacije Hastor, koja dolazi iz Novog Travnika. Emina trenutno pohađa prvu godinu II ciklusa na Prirodno-matematičkom fakultetu, na odsjeku Biologija – smjer Genetika. Ono čime se ova mlada djevojka trenutno može pohvaliti, uz uspješno okončan prvi ciklus studija, jeste posvećenost naučno-istraživačkom radu, koja je urodila plodom krajem 2018. godine, kada je njeni i istraživanje njenih kolega pozitivno vrednovano, i kao takvo objavljeno u časopisu „Drugs and chemicals toxicology“.

Ova naša vrijedna stipendistkinja je protekle godine zajedno s kolegicom Irmom Durmišević i nekoliko asistenata, uporedno s izradom diplomskog rada, radila kompleksno istraživanje na temu „Evaluacija toksikoloških i antimikrobnih svojstava eteričnih ulja lavande i smilja“. Istiće kako je to bio mukotrpan rad koji je uključivao mjesecce rada u laboratoriji, te pregledanje i analiziranje na stotine mikroskopskih preparata. Njihov trud i rad su urodili plodom još u maju, kada su imali napisan rad, koji su poslali u redakciju časopisa „Drugs and chemicals toxicology“, a koji je odobren već u avgustu.

Emina je imala čast da u septembru predstavi pomenuto istraživanje na Botaničkom kongresu u

Novom Sadu. Rad je uspješno ocijenjen i objavljen prije mjesec dana, a naša stipendistkinja ističe kako se već posvetila novom projektu, koji se tiče toksikoloških svojstava parabena, koji se danas nalaze u većini kozmetičkih preparata, te se nadam kako će naredne godine uspješno okončati još jedno istraživanje, te na taj način upotpuniti i unaprijediti svoje znanje i vještine.

Emina ističe kako je genetika oblast koja ju je zainteresovala jako rano, još u osnovnoj školi, kada je zamišljala i pričeljkivala da jednog dana postane uspješna naučnica u tom polju. „Na mojo radost, genetika je ostala glavna oblast mog interesovanja i u srednjoj školi, tako da sam odlučila da to i upišem. Prošla godina je bila jako uspješna za mene, s obzirom na to da sam diplomirala, ubrzo nakon toga i udala se, ali sam ipak odlučila nastaviti svoje obrazovanje, u čemu mi veliku podršku predstavljaju muž i porodica.“

Stipendistkinjom Fondacije Hastor je postala 2008. godine i ističe kako je to jedan od njenih velikih uspjeha na koje je izuzetno ponosna, te da Fondacija danas predstavlja dio njenog identiteta.


„Pored svega što jesam, jedan od mojih velikih uspjeha jeste biti stipendista Fondacije već jedanaest godinu zaredom. Finansijska i moralna podrška je olakšala moje školovanje i stalno mi davala vjetar u leđa da budem još bolja. Danas s ponosom mogu reći da imam još jednu veliku porodicu, koja će ostati dio mog života i kada završim školovanje.“

Maida Husnić

KENAN KRAKOVIĆ DOBITNIK STIPENDIJE HARVARD UNIVERZITETA

Broj stipendista Fondacije Hastor u kontinuiranom je porastu, a većina njih na najbolji mogući način potvrđuju atribut stipendiste, kao nosioca potencijalnih društvenih promjena, te samosvesnih budućih lidera u svojim zajednicama. Izuzetno smo ponosni na činjenicu da dijelom naše Fondacije iz godine u godinu postaju sve uspješniji i ambiciozniji mlađi ljudi koji su se vlastitim zalaganjem, talentom, ali i konzistentnim radom uspjeli u istaći u izvjesnim naučnim poljima djelovanja. Jedan od takvih primjera je i naš novi stipendista Kenan Kraković. Naime, Kenan je dobio stipendiju za predmet s Harvarda, jednog od najprestižnijih fakulteta na globalnom nivou, za predmet Osnove neuroznanosti: električne osobine neurona. Stipendija je bila zajednička inicijativa grada Zagreba, Fondacije BH Futures, Odjela za mlade EU u Hrvatskoj i Harvard Univerzitet. Uvjet je bio slanje motivacionog pisma, te detalja o iskustvu koje se tiče predmeta za koji se aplicira. Najboljim aplikantima, među kojima je i naš novi stipendista, dodijeljena je stipendija u iznosu od 3 000 dolara. Sam predmet će se klasificirati kao validan, a u tom će kontekstu nositi i prethodno određeni broj ECTS bodova.

Za mene je ova stipendija sjajna prilika da produbim znanje iz oblasti neuroznanosti sa stajališta bioinžinjeringu, ističe Kenan. Kenan je na svom matičnom Burch Univerzitetu osnovao i Klub za biomedicinska istraživanja, u sklopu kojeg, zajedno s nekoliko kolega, finalizira prvi naučni rad. Kenanove ambicije za budućnost također su orientirane ka izradi naučnih radova na polju neuroznanosti. Stoga će u okviru prilike koja mu je pružena ostvarivanjem stipendije za prethodno pomenuti predmet imati sjajnu mogućnost za stjecanje i proširenje svojih znanja, ali i za konsultiranje s naučnicima s Harvarda, te ostalim polaznicima ovog predmeta širom svijeta.



Kenan je svoje formalno obrazovanje započeo u Osnovnoj školi „Harmani 1“ u Bihaću, a potom je odlučio upisati Srednju medicinsku školu u Bihaću, te je njen početak finalizirao titulom učenika generacije. U okviru srednjoškolskog obrazovanja Kenan je osvojio brojna takmičenja, među kojima ističe da je bio finalista federalnog takmičenja iz oblasti genetike, finalista kantonalnog takmičenja iz oblasti fizike, prvo mjesto na CIVITAS-ovom projektu „Građanin“, prvo mjesto na regionalnom UNESCO-vom takmičenju na temu „Zaštite vodenih resursa“, prvo mjesto na takmičenju državnog nivoa u govoru u Banjoj Luci. Pored toga, bio je i odabrani učesnik programa „Youth leadership“, koji je organiziran od strane Američke ambasade, učesnik regionalne naučno-istraživačke škole u Srbiji pri Istraživačkom institutu „Petnica“, te učesnik-volontar Evropske noći istraživača u septembru 2018. Trenutno je student Genetike i bioinžinjeringu na Burch Univerzitetu s ostvarenim projektom 10.0. Ono što je sigurno jeste da Kenanovi postignuti uspjesi govore dovoljno sami za sebe, te da su rezultat konzistentne posvećenosti i angažiranosti u mnogim društvenim znanstvenim domenama djelovanja.



Pored postignuća na polju obrazovanja i nauke, Kenan je veoma aktivan i nadasve uspješan i u sferi sporta. Naime, šest puta je ponio titulu prvaka karatea Bosne i Hercegovine u svim selekcijama, a 2015. godine bio i balkanski prvak. Nositelj je zvanja Crni pojas, odnosno Majstor karatea, a trenutno je angažiran i kao trener u karate klubu „Champion“. Kenan svira gitaru u bendu koji je u pripremi, a ljeti nastupa i kao ulični pjevač na Ferhadiji gdje svira i pjeva kao ljetni performer. Također, voli i da piše instrumentalnu muziku na električnoj gitari. Pored navedenog, njegovo polje interesovanja proteže se i na pisanje aforizama, poezije i proze, a njegove pjesme objavljene su u nekoliko regionalnih zbirki poezije.

Fondaciju Hastor, kao ogromnu mrežu mladih perspektivnih talenata iz svih dijelova Bosne i Hercegovine, prepoznao je kao idealnu priliku prevashodno za lični razvoj. Mišljenja je da će mu prilika da bude njenim sastavim dijelom osigurati i svojevrsni podsticaj da bude još uspješniji na znanstvenom polju koje je predmetom njegovog interesovanja i naučnog istraživanja.

Amina Vatreš

FONDACIJA HASTOR U SARADNJI S PREVENT GRUPACIJOM POČINJE S REALIZACIJOM . . . NOVOG CIKLUSA **TAKT AKADEMIJE**



Dragi učenici i studenti, u ovomjesečnom izdanju rubrike FH učionica donosimo nekoliko napomena u vezi s upotrebom afrikata, ali i jednu vježbu za poboljšanje istog.

O RAZLIKOVANJU GLASOVA Č I Ć

- Nerazlikovanje glasova č i ć česta je osobina bosanskih narodnih govora. Ova je pojавa prilično široko rasprostranjena. Lingvisti kažu da ništa što se kaže na temelju svoga jezičkog osjećanja, samo ako uspješno vrši komunikativnu funkciju, ne može biti lingvistički neispravno. To je, naravno, tačno. Ali u ime te jezičke slobode niko nema pravo da svoje dijalekatske niti idiolektske osobenosti nameće drugima. Ovo se, naravno, odnosi na one koji druge podučavaju, na one čija je riječ javna i koje slušaju mnogi. Takvi su odgajatelji, nastavnici, spikeri, novinari itd. Ako jedna odgajateljica (ili odgajatelj) u nekom vrtiću ne razlikuje glasove č i ć, onda postoji mogućnost da djeca, ugledajući se na nju (ili njega), steknu baš takvu naviku. Glasovi č i ć imaju malu funkcionalnu moć, a to znači da ćemo mi razlikovati značenje riječi i kod onih govornika koji ne razlikuju č i ć.
- Ako su to riječi kao:
- *spavačica* (ona koja spava) i *spavaćica* (košulja za spavanje), *čar* (draž) i *ćar* (dubit), *jahačica* (ona koja jaše) i *jahaćica* (naprimjer mazga), u razlikovanju će nam pomoći situacioni kontekst, jer ćemo uvijek znati razlikovati spavačicu od spavaćice ili jahačicu od jahaćice.

Ipak, u standardnome bosanskom jeziku treba razlikovati glasove č i ć i u izgovoru i u pisaju.

Naravno, ne treba zamjeriti onima koji ne razlikuju te glasove, osim ako po prirodi posla nemaju pravo da to ne razlikuju. To se odnosi na nastavnike, profesore, novinare i sve one čija je riječ upućena javnosti.

Ako je vama te glasove teško razlikovati u izgovoru, nemojte to osjećati kao veliki problem. To možete savladati bez većih poteškoća. Potrebno je samo malo vježbe i malo „samokontrole“ u govoru. Jer, ne radi se o govornoj mahani, već o navici. A ako smo na nešto naviknuti, od toga se možemo i odviknuti.

Evo vam prijedloga za vježbu.

Pokušajte nekoliko puta ispravno pročitati ove rečenice. One su, uz male izmjene, preuzete iz jednog starog udžbenika.

Otrčao čobančić u dućančić da kupi čančić, bič i lančić. Čuči momčić na čilimčiću i čeličnim čekićem tuče čavle u čvornatu daščurinu. U bašči iza kuće ciče kučići, mijauču mačići, pijuču pilići, čućore pačići.


O RAZLIKOVANJU GLASOVA Đ I Đ

- U nekim narodnim govorima bosanskog jezika nema razlikovanja glasova đž i đ. U njima se, zapravo, fonem đ javlja kao zamjena fonema đž, pa se može čuti:
- *đamija* (umjesto: džamija), *piđama* (umjesto: pidžama) i sl.
- To nije osobina standardnoga bosanskog jezika.
- Ipak, takve greške nećemo dirati kada se javе u osobnim imenima: *Đenana*, *Đemal*, *Đehva* i drugim imenima u kojima je đž izjednačeno sa

đ, ali samo u onim slučajevima kada se neko zaista tako zove, kada mu je ime tako upisano u dokumentima.

Iako neprihvatljivo za standardni jezik, to je realnost, a usaglašavanje te realnosti sa standardom zahtijevalo bi određenu administrativnu proceduru za koju se samo zbog standarda i ne treba odlučivati.

Priredio: Razim Medinić



OPTIMIZAM

Nedavno sam u kancelariji Fondacije Hastor prisustvovao razgovoru jedne grupe studenata stipendista naše Fondacije.

„Učitelju Ramo“, obrati mi se Hasan, „ja sam dugogodišnji stipendista Fondacije Hastor, bio sam na puno sastanaka i zvaničnih i nezvaničnih. Tek onako spontano, nekad s jednim, sa dvojicom, a nekad i puno više naših stipendista vodili smo razgovore o svemu i svačemu, ali nikad nisam čuo ni od koga da izgovara neku psovku ili neku ružnu riječ.“

„Eh ti ode baš u krajnost“, uskoči u razgovor Ajla, „ja nisam čula ni neću ni ne mogu, ma ni sad ču. Svi se trudimo da izvršimo zadato s voljom i na vrijeme“, zaključi Ajla.

„Na našim sastancima se ne priča o crnoj hronici, već o uspjesima kojih ima jako mnogo od onih na školskim, općinskim, kantonalnim do državnih takmičenja, a ima i takmičenja i visokih rezultata s međudržavnih takmičenja“, reče Asim.



„Ja sam jučer pričala s mojim roditeljima“, poče priču Amina, „zamislite da su stipendisti Fondacije Hastor pokazali toliko znanja da ih pozivaju u Predsjedništvo države na razgovor. Jasmina Kavgić iz Srebrenika i Maida Husnić iz Mostara su 27. decembra 2018. godine razgovarale sa gospodinom Šefikom Džaferovićem, članom Predsjedništva države Bosne i Hercegovine. Pa, zar to nije veliko dostignuće?! Ko zna, možda baš njih ili neke druge naše stipendiste pozovu i da rade kao savjetnici, jer nas ima puno vrlo pametnih, a i školovanih“, zaključi Amina.

Jedna od osnovnih osobina stipendista Fondacije Hastor je optimizam. Sahate i sahate možete provesti u razgovoru sa njima i slušati samo o lijepim stvarima, o planiranju kako lakše ostvariti željeni cilj, o načinu kako lakše svojim trudom i zalaganjem punim kapacitetom ostvariti svoje želje. Razgovaraju jedni sa drugima, upoznaju svoje sagovornike o tome kako su došli do ostvarenja cilja, bilo da je to uspjeh u školi, visoke ocjene iz određenog predmeta, bilo da je uspjeh na nekom

takmičenju iz nastavnih predmeta ili na polju likovne, muzičke ili neke druge umjetnosti. Imaju oni i padova, ali o tome ne pričaju osim ako im to ne služi kao dokaz kako su iz tog neuspjeha izvukli pouku i uspjeli.

Pored optimizma, kod stipendista Fondacije Hastor prisutna je i nesebičnost. Uvijek su spremni pomoći drugima iako imaju jako malo slobodnog vremena zbog svoje edukacije.

„Samo sam je preveo preko ulice koja je bila prekrivena ledom, a ona, žena sedamdesetih godina me pogleda i reče: 'Hvala ti sine, Bog ti pomogao!' 'A šta mi pomogao?', upitah je smijući se.

‘Pomogao ti da ne želiš više nego što ti treba.’

Od tog dana sve mi nekako polazi za rukom, sve izvršavam lahko sa zadovoljstvom“, ispriča Safet.

„Hamed je bio učenik devetog razreda osnovne škole kad me je u aprilu zamolio da mu pomognem da dobije bolju ocjenu iz engleskog jezika jer mu kvari prosjek uspjeha. Sretosmo se u junu kad se sa diplomom vraćao iz škole.

‘Vidi, sve petice. Hvala ti! Pogleda me i odjuri kući. Taj pogled i te dvije riječi zahvale stalno su uz mene i svi mi poslovi idu baš kako želim“, ispriča Raza.

Saslušah još nekoliko ovako lijepih istinitih događaja stipendista Fondacije Hastor, pa se pozdravih s prisutnima u znak rastanka i uputih se ka svojim drugim obavezama. Udaljavajući se od kancelarije zaključih da je razgovor s ovim mladim, pametnim i školovanim osobama bolji od apaurina, bolji od bilo kog medikamenta koga medicina preporučuje za smirenje depresivnih bolesnika.

Ramo Hastor

STIPENDISTA MJESECA

Zahvaljujući svom dosadašnjem angažmanu i doprinosu radu Fondacije Hastor te nizu uspjeha na polju obrazovanja, titula stipendiste mjeseca ovaj put je više nego zasluženo pripala Jasmini Kavgić.

Jasmina Kavgić je stipendistkinja Fondacije Hastor, koja dolazi iz Srebrenika i trenutno pohađa prvu godinu II ciklusa studija na Ekonomskom fakultetu Univerziteta u Tuzli, odabравši smjer Računovodstvo i revizija. Tokom svog osnovnog i srednjeg obrazovanja bila je učesnica raznih vannastavnih aktivnosti i takmičenja, među kojima ističe osvojeno prvo mjesto na državnom takmičenju iz knjigovodstva, održanom 2014. godine.

Jasmina je pohađala Srednju ekonomsku školu u Mješovitoj srednjoj školi u Srebreniku. Godine 2014. uspješno okončava srednjoškolsko obrazovanje, a potom, iste godine, upisuje Ekonomski fakultet u Tuzli. Ističe kako je svaki

početak izuzetno težak, te kako se niti jedan uspjeh ne može postići preko noći. „Kada krenete u ono što želite, čekaju vas brojni izazovi, pogrešne prečice i burne oluje. Umijeće je zapravo znati izboriti se s tim i stići do cilja. Tako sam i ja tokom obrazovanja naišla na mnogo prepreka i izazova, na mnogo, tada bezizlaznih situacija, ali ipak najbitnije je da pamtim lijepe trenutke i iz svake borbe izađemo kao pobjednik. Ono što je također bitno jeste da iz svake prepreke naučimo lekciju jer, sve ono što nam se dešava, dešava se sa nekim razlogom. Svaka prepreka treba da nas ojača i učini još istrajnjim na putu ka cilju. Mogu slobodno reći da svjedočim tome.“

Jasmina
Kavgić

Jasmina naglašava kako je bilo trenutaka kada je željela odustati od svega, upisati bilo kakve ocjene i uživati, no, nakon svake te misli stizalo je neko olakšanje, volja i želja da ide naprijed i istraje na svom putu.

S obzirom na to da je uvijek vrijedno radila tokom cijele godine, svaku godinu svoga studija dosad je uspješno završavala u junu, te je tako slobodno vrijeme do nove akademске godine provodila tako što se posvetila stjecanju iskustva u praksi. Između ostalog, Jasmina je radila kao promoter u jednoj marketing agenciji, odradila stručnu praksu u Sberbanci. Osim toga, imala je priliku da radi posao u struci u kompaniji Džeko-commec d.o.o u Srebreniku, gdje je zahvaljujući radnom kolektivu usvojila mnoga znanja i iskustva.

Jasmina je diplomirala 2. jula prošle godine, odbranivši rad na temu „Organizacija računovodstvenog nadzora u preduzeću“. Zahvaljujući svojoj posvećenosti studiju koji pohađa, ova entuzijastična i izuzetno vrijedna djevojka može se pohvaliti nizom uspjeha koje je dosad ostvarila tokom svoga školovanja. U decembru 2018. godine dobila je Zlatnu plaketu kao Zlatni student i Student generacije Ekonomskog fakulteta u Tuzli. Ono što je šira javnost odmah uočila jeste njen prosjek, koji je jedinstven na Univerzitetu u Tuzli, a na Ekonomskom fakultetu u Tuzli, Jasmina je druga studentica u historiji s ostvarenom prosječnom ocjenom 10.00.


Dvije godine zaredom (2017. i 2018. godine), izabrana je za najboljeg studenta Ekonomskog fakulteta Univerziteta u Tuzli i tim povodom je dobila priznanje i novčanu nagradu Federalnog ministarstva obrazovanja i nauke.

Vrhunac njenog uspjeha i obrazovanja na prvom ciklusu studija bilo je predstavljanje Univerziteta u Tuzli u Predsjedništvu BiH. Naime, Jasmina je, zajedno s kolegama, najboljim studentima svih javnih univerziteta u BiH, prisustvovala svečanom prijemu koji je organizirao član Predsjedništva BiH Šefik Džaferović. „Bio je zaista neopisiv osjećaj biti među 8 najboljih studenata u Bosni i Hercegovini i lijepo je znati da se moj trud i rad zaista isplatio. Priznanja i nagrade koje sam dobila predstavljaju mi veliku satisfakciju i motivaciju za izgradnju karijere u

Bosni i Hercegovini i dokaz su da postoji bolje sutra. One su upravo dokaz da investicija u znanje vraća najbolje kamate, i da borba za uspjeh, motivisanost, ambicioznost i usmjerenošć rezultiraju pobjom na putu ka uspjehu“, ističe Jasmina.

Posebnu zahvalnost, kako kaže, duguje Fondaciji Hastor, čiji je stipendista i volonter već tri godine. „Podrška Fondacije Hastor mi je bila od ogromnog značaja. Nije bilo lako boriti se s iskušnjima na koje sam naišla tokom obrazovanja, no, bilo je mnogo lakše ići u nove pobjede znajući da ima neko ko nam daje vjetar u leđa. Fondacija Hastor je dokaz da se trud i rad isplate i cijene. Divno je biti dio porodice Fondacije Hastor.“

Amina Vatreš



1. KENAN KRAKOVIĆ

Kenan Kraković je prema posljednjem konkursu za potencijalne studente stipendiste, zahvaljujući izvanrednim rezultatima koje je postigao tokom svog školovanja, zvanično postao stipendistom Fondacije i dijelom ove velike porodice. O Kenanovoj posvećenosti, istražnosti i napretku u domenama koje su predmet njegovog interesovanja, ali i formalnog obrazovanja, svjedoče brojna postignuća kako na državnim, tako i na regionalnim takmičenjima, kao i učešća u okviru mnogih projekti. Možda je i Kenanov najveći uspjeh osvajanje stipendije jednog od najprestižnijih univerziteta svijeta, Harvard Univerziteta, za predmet Osnove neuroznanosti: električne osobine neurona. Pohađanje Srednje medicinske škole u Bihaću okončao je titulom učenika generacije, a svoje formalno obrazovanje odlučio je nastaviti na Burch Univerzitetu, gdje je trenutno student Genetike i bioinženjeringa s ostvarenim projektom ocjena 10.00. U okviru svog matičnog fakulteta Kenan je osnovao i Klub za biomedicinska istraživanja čija je elementarna svrha upravo istraživanje, razvijanje naučnih spoznaja, te izrada naučnih radova koji se referiraju upravo na oblast neuroznanosti.

Pogled na Fondaciju Hastor, njenu dugoročnu misiju, kao i članove njene strukture Kenan opisuje riječima:

Fondacija Hastor je ogromna mreža talenata Bosne i Hercegovine. Neki od najboljih i najpametnijih mladih ljudi koje sam upoznao članovi su upravo Fondacije Hastor. Biti član tako moćne skupine ljudi jakog karaktera i oštrog uma, velika je privilegija i za mene znači mnogo, prvenstveno u smislu ličnog razvoja, budući da vas takvi ljudi uvijek natjeraju na razmišljanje o tome da li možete uraditi više na polju kojim se bavite. Nadam se da će u skorijoj budućnosti upoznati članove Fondacije iz ostatka BiH i, zašto da ne, s njima ostvariti saradnju u izvjesnom naučnom poduhvatu.

2. AJŠA ĐUHERIĆ


Ajša Đuherić rođena je 1996. godine. U Zenici je završila Prvu gimnaziju, nakon čega upisuje studij engleskog jezika i književnost na Odsjeku za anglistiku Filozofskog fakulteta u Sarajevu. Prošle godine je diplomirala i dobila zvanje bakalaureat engleskog jezika i književnosti, nakon čega je, odabравši književni smjer, upisala master.

Rad Fondacije Hastor bio mi je poznat već neko vrijeme, ali sam se detaljnije informisala o Fondaciji za vrijeme prethodnog Sarajevo Film Festivala i dodjele Počasnog srca Sarajeva gospodinu Hastoru. Bila sam uistinu impresionirana radom Fondacije i nakon saznanja o dobitku stipendije, dobila sam još veću motivaciju za rad. Kao studentica engleskog jezika, smatram da su jezici jedan od ključnih faktora u povezivanju s različitim kulturama, te se nadam da će u budućnosti imati priliku da još više proširim svoje znanje. U slobodno vrijeme se bavim različitim hobijima – ponajviše pozorištem i muzikom, ali i druženjem s prijateljima.


3. IVANA LAZIĆ

Ivana Lazić rođena je i živi u Janji. Završila je srednju Ekonomsku školu u Bijeljini, nakon koje upisuje Pravni fakultet Univerziteta u Istočnom Sarajevu, u odjeljenju u Bijeljini. Ljubav prema pravu rodila se još u sedmom razredu osnovne škole i tada je odredila svoj glavni cilj: postati diplomirani pravnik koji će svoje znanje prenijeti na druge i pomoći ljudima da rješe probleme.

Istiće kako nema puno slobodnog vremena, ali u trenucima kad ne bdije nad knjigom, napiše poneku priču ili pjesmu. Ono što Ivani istovremeno predstavlja obavezu i hobi jesu vježbe koje joj, uslijed problema s nogom i činjenice da je primorana hodati pomoći štaka, uveliko pomaže da održi snagu u donjim ekstremitetima. Voli da kuha, te da provodi vrijeme s roditeljima i prijateljima koji su njeni najveći podrška.



Od drugarice sam čula za Fondaciju Hastor. Posjetila sam web-stranicu Fondacije, pročitala sve informacije o Fondaciji gdje sam se iznenadila ciljevima koje Fondacija želi ostvariti, a to je prvenstveno podrška mladim ljudima i podsticaj studentima kako bi oni postigli što bolji uspjeh tokom studiranja. Ono što je privuklo moju pažnju bila su saznanja o volontiranju u Fondaciji, na osnovu kojih stariji studenti pomažu mladima prilikom savladavanja određenih problema, te pomoći u svim drugim životnim okolnostima. Međutim, tada nisam uspjela da se prijavim na konkurs, pa sam svoju prijavu poslala sredinom novembra 2018. godine. Uslijedilo je iznenadenje par sedmica kasnije, kada sam dobila poziv za intervju, nakon čega mi je rečeno da dođem na razgovor pred komisiju Fondacije u Sarajevo. Razgovor koji sam

obavila s učiteljem Ramom, uvaženim gospodinom Seidom i ostalim članovima, pokazao mi je da sam u Fondaciji pronašla ono što sam tražila godinama u svojoj okolini, u ljudima oko sebe. Pronašla sam prvenstveno iskrene prijatelje kojima se mogu obratiti uvijek kada imam neki problem, ljudi koji su spremni da drugima pruže nesrebičnu podršku i pomoći kako bi se svaki problem riješio. Mogu slobodno reći da sam se iznenadila slušajući ono što su mi tada rekli i upijala sam svaku njihovu reakciju. Sljedeće sedmice, nakon obavljenog razgovora, administracija Fondacije Hastor mi je javila da sam postala novi stipendista Fondacije, čime sam bila prijatno iznenadena, jer sam shvatila da sam postala član jedne velike porodice koja daje ljubav i sreću svim ljudima oko sebe.

4. ADNAN HATIBOVIĆ

Adnan je student Odsjeka za sociologiju na Filozofском fakultetu Univerziteta u Sarajevu. Rođen je u Sarajevu 1996. godine, gdje je završio osnovnu i srednju školu. Student je prve godine master studija, a diplomirao je 2018. godine, kao jedan od najboljih studenata.

Ispriu uopće nisam ni planirao predavati u Fondaciju Hastor, ali zbog određenih okolnosti sam ipak donio odluku pokušati, i na svu sreću uspio sam postati stipendista iste. Naime, određeni administrativni problemi na Filozofском fakultetu onemogućili su moj prvobitni naum da predam na konkurs za općinsku stipendiju, čime sam morao odlučiti koje će druge opcije uzeti u razmatranje. Preko poznanika sam čuo za Fondaciju i odlučio sam pokušati. Bio sam upoznat s kriterijem vrednovanja i načelom objektivnog procjenjivanja na kojem Fondacija Hastor insistira. I pored određene sumnjičavosti i bojazni da neću biti primljen, dobio sam priliku, zbog koje sam sretan i za koju se nadam da će je adekvatno opravdati.

Pored toga što pokazuje posebne sklonosti ka studiju, zainteresiran je i za sport i sportsku rekreaciju. U slobodno vrijeme rekreativno se bavi fitnessom. Smatra da je sport divna stvar koja pomaže usavršavanju fizičkog aspekta ljudske



5. DEJANA SAVIĆ

Dejana dolazi iz Bijeljine. Završila je srednju Ekonomsku školu, smjer Poslovno-pravni tehničar, odakle i dolazi njena ljubav prema pravu. Student je četvrte godine Pravnog fakulteta Univerziteta u Istočnom Sarajevu s odjeljenjem u Bijeljini. Uže polje njenog interesovanja je Građanskopravna oblast na čelu s porodičnim i socijalnim pravom.

Od hobija izdvaja šivenje, pletenje, vezenje goblena u čemu, kako kaže, pronalazi bijeg od svega što je čini neraspoloženom.

Postavši dio Vas sam dobila priliku da volontiram sa djecom i kroz druženje sa njima još više shvatim da pripadam ovoj oblasti. Postali su jedan od izvora moje motivacije i bude u meni ideje za koje će se sutra, kada postanem pravnik, boriti svom snagom. Mlađi stipendisti su izrazili želju da ih naučim da pletu i izrađuju druge ručne radove tako da smo zajednički pronašli novi metod obrađivanja zadatih tema. Bit ćemo multifunkcionalni, opuštati ćemo se praveći ručne radove i govoriti o temi.



6. ILDA BAJRIĆ



Ilda dolazi iz Bihaća gdje studira germanistiku na Pedagoškom fakultetu Bihać. Završila je Gimnaziju "Bihać" u Bihaću i bila je učenik generacije u osnovnoj školi. U slobodno vrijeme voli čitati, naročito rusku književnost, a donedavno je bila član kulturno-umjetničkog društva.

Stipendisticom Fondacije Hastor je postala u decembru 2018. godine. Istiće da joj je zadovoljstvo biti dijelom organizacije kakva je Fondacija Hastor.



OBJEKTIV

: Delila Veispahić



Dženita Ibić, Brčko

Edukacijsko – rehabilitacijski fakultet
Tuzla

Kažu da postoji samo jedna porodica (otac, majka, brat, sestra) i da je ona sve na svijetu. To je dijelom tačno, tačno za one koje nisu dio porodice Fondacije Hastor. Fondacija Hastor je jedna velika porodica, porodica s огромним brojem članova, koji pružaju sve od sebe da učine život boljim, ljepšim i ispunjenijim. Kako mladi od ptice idu pod njeno krilo da se sakriju od nevremena, od problema, s pravom mogu reći da je Fondacija jedno veliko krilo koje pokriva i štiti hiljade učenika, studenata, štiti od neznanja, štiti od pokvarenog vremena i pokvarenih ljudi. Ona je tu za sve nas, krenuvši od učenika koji je tek krenuo u školu, koji tek uči šta je život, pa do onih koji su se ostvarili u svom polju, koji su postigli svoj cilj. Ona je jedina koja cijeni znanje i trud učenika, koja daje sve od sebe da tim znanjem promijenimo svijet oko sebe. Ni milioni riječi i rečenica neće biti dosta da iskažu šta je to Fondacija Hastor, koliko smo mi svi sretni što smo dio ogromne porodice, porodice koja nas sve jednakovo voli i poštuje.

Svaki sastanak predstavlja jedno novo druženje, jedno novo stjecanje iskustva i osmijeha razmijenjenih među učenicima. Svaki sastanak nosi u sebi puno pozitivnih priča, iskustava, mišljenja i svaki je podjednako važan. A onaj koji bih ja izdvojila je održan jednog veoma hladnog novembarskog jutra.

Bilo je to veoma hladno i promrzlo jutro. Iznad krovova su se uvijali sivi dimovi i nestajali na hladnom jutarnjem vazduhu. Prozore je bila prekrila izmaglica. Mraz ih je prošarao na maštovite načine. Svi smo drhtali od zime, ušli smo u prostor i zagrijali se čajem i topлом riječju. Bili smo svi nasmijani, veseli i spremni za rad. Krenuli smo obrađivati temu, da se zagrijemo i zabavimo. U jednom trenutku, pogledavši kroz prozor, vidjeli smo ispod nastrešnice tri

mlada momka kako ustaju ispod jorgana i sjede. Samo smo se pogledali. Šutjeli smo svi par minuta, našli smo se zatečeni time što vidimo. Ta tri momka ustadoše i stavljajući ruke u travu prekrivenu mrazom, umiše se. Bile su to izbjeglice. Ljudi kao i mi, ljudi koji su prisilom istjerani iz svojih domova, koji su ostavili svoje najmilije i došli u neke druge gradove gdje ih svi s preziron gledaju, bježe od njih kao da su zarazni. I to su ljudi. Pogledali smo se svi i bilo je jasno šta vidimo ispred sebe, nekima su i oči se napunile suzama. Vidjeti taj prizor nije nimalo lakko. Na zajednički prijedlog, skupili smo novac i otišli odmah u prodavnici, kupili hrane da im može biti za nekoliko dana. Kada smo išli prema njima da im predamo šta smo im uzeli, gledali su nas s nekim vidom straha, da ih nećemo otjerati, da nećemo zadirkivati. Dali smo im vrećice, gdje su zaplakali svoje troje i zahvaljivali se. Istina, proradile su emocije. Vratili smo se u naš prostor, gledavši njih kroz prozor kako s osmijehom i srećom dijele komad hljeba i kako su sretni s tim što imaju. Nakon tog prizora, svi smo bili odmah veseliji, ispunjeniji znajući da smo nekom uljepšali dan, da smo izazvali osmijeh na lice.

To je jedan događaj u nizu događanja koji se desi, bilo to da pomognemo jedni drugima unutar grupe, bilo da pomognemo nekom na ulici. Divno je biti dio Fondacije Hastor, one koja nas uči da gledamo „šire“, da budemo tu jedne za druge, u dobru i zlu.

**20 057****volonterskih
sati****271****volonterskih
radionica****63****opcina**

Na osnovu baze podataka utvrđeno je da su stipendisti i volonteri Fondacije Hastor u proteklom mjesecu zabilježili 20 057 volonterskih sati. Kao i do sada, najveći broj volonterskih sati ostvaren je na volonterskim sastancima naših stipendista – studenata, srednjoškolaca i osnovaca na 271 volonterske radionice u 63 općine širom Bosne i Hercegovine. Ovoj velikoj brojci doprinosi i volonterski angažman naših studenata koji volontiraju u administraciji i redakciji Fondacije Hastor, kao i angažman stipendista koji rade na razvoju i održavanju aplikacije Fondacije Hastor i naše web-stranice. Obavezna tema o kojoj su naši stipendisti diskutovali na svojim volonterskim druženjima proteklog mjeseca je „*Sloboda javnog govora. Kako pobijediti strah?*“ Pored obavezne teme, stipendisti su obrađivali i druge interesantne teme, a naši studenti su dio volonterskih sati odvojili kako bi pomogli mlađim stipendistima da što bolje savladaju školsko gradivo.

Neke od najzanimljivijih tema:

- **Svaki kraj je novi početak**
- **Grupni rad i njegova važnost**
- **Dan volontera (5. decembar) i značaj volontiranja**
- **Čitanje i ispravljanje TOEFL Reading testova**
- **Predrasude i stereotipi**
- **Čovječanstvo i priroda, ekologija i tehnologija**
- **Kako sam postigao uspjeh i postao zadovoljan svojim životom**
- **Postaviti cilj i ostvariti ga!**
- **Važnost umjetnosti u našem društvu?**
- **Koliko je umjetnost rasprostranjena u BiH?**
- **Odlazak mlađih iz BiH**
- **Emocije i kako se osjećamo**
- **Otpad kao problem današnjice**
- **Drug je drugu ogledalo**
- **Konkretnе metode i načini učenja**
- **Smisao i vrijednost obrazovanja**
- **Zašto je čitanje važno?**
- **Reklame i mediji**
- **Diskriminacija na tržištu rada**

Općine u kojima su u proteklom mjesecu održane volonterske radionice:



novogodišnje čestitke

